



雜識
卷一

書號	
登記號	五八〇四六
函冊	一六

隙光亭雜識卷一

長白揆叙愷功父惟實居

男永壽仁山甫謹較訂

余髫年時聞里語有云輦轂之下龍宿郊民時未知其
義亦不識其語起於何代也一日偶與王閣學麓臺
論畫麓臺云董北苑有龍宿郊民圖爲海內所珍當
日因宋藝祖巡行郊外父老懼迎遂駐蹕其地故作
此圖余方悟里語蓋本諸此圖今藏江南某氏

左傳僖二十二年楚人伐宋宋公將戰大司馬固諫曰

天之棄商久矣君將興之弗可赦也已杜氏解以弗
可爲句以赦爲赦楚勿與戰余按是時楚已強盛故
僖之四年齊桓伐楚且退師而爲召陵之盟今宋襄
非齊桓之比何得云赦楚耶司馬之語蓋謂宋公違
天將不爲天所赦宥也杜說不可從

烏斯藏喇嘛香焚之能驅邪辟穢京師貴重之不可多

得有紅黃二種紅者用番紅花合成黃者用龍鯉亦

鱗鯉俗稱
穿山甲指爪其價比紅者尤昂

回紇後改稱回鶻其先曰高車部亦曰勅勒訛爲鐵勒

唐天寶三載始自立爲可汗明皇亦因而册命之其
時斥地愈廣盡有突厥故地祿山之亂遣兵助唐收
復兩京肅宗始以幼女寧國公主妻之德宗朝又妻
以咸安公主始請易回紇曰回鶻言捷鷲猶鶻然穆
宗時復以太和公主下降憲宗女也至於武宗回紇
衰亂其後中華亦多事貢會不常史失其傳蓋不可
得而詳矣或云今之徇民是其苗裔或曰 或曰

迄無確據

上云卽今之烏斯藏也昔年達賴喇嘛曾進一銅器上有

隋書雜錄 卷一 藏板
大唐年號蓋當年公主下嫁贈遺之物矣再考憲宗
元和初回鶻再朝獻始以摩尼至其法日晏食飲水
茹葷屏漣酪可汗嘗與之共國者也今之喇嘛卽當
時之摩尼其爲烏斯藏無疑

聖鑒淵博度越前古如此

齊書東昏侯鑿金爲蓮華以帖地令潘妃行其上曰此

步步生蓮華也余閱釋典見佛報恩經有云鹿女步

步舉足皆生蓮華

文多不載

東昏語蓋取此胡身之註通

鑑所未及可以補之

內典耆域因緣經絕似史記扁鵲倉公傳而奇詭過之
曲子一句中兩用韻者謂之短柱見陶南邨輟耕錄徐
文長四聲猿中玉禪師沽美酒一曲正用此體

達磨之磨蘇子瞻詩去聲呼按續傳燈錄繼昌禪師云

木佛不度火甘露臺前逢達磨惆悵洛陽人不來面

壁九年空冷坐又大中隆禪師云時時逢見釋迦處

處撞着達磨放步卽交肩開口卽咬破又壽寧善資

禪師云諸方五日一叅壽寧日日陞座莫怪重說偈

言過在西來達磨竝可證也作平聲者非

周櫟園閩小記云蟲名石背者荔之蝨賊夜燕則龍眼熟時所忌或以夜燕爲荔枝之害者誤也

佛書伊蘭臭若胖屍熏四十由旬仲秋月栴檀發香永無伊蘭臭惡之氣楞嚴云香臭二種流氣不生伊蘭及栴檀木是也或以爲香草而誤引用之此不讀佛書之過耳

佛經言友有四種一者如花好時插頭萎時捐之見富貴則附貧賤則棄是花友也二者如秤物重頭低物輕則仰有與則敬無與則慢是秤友也三者如山譬

如金山鳥獸集之毛羽蒙光貴能榮人富樂同歡是山友也四者如地百穀財寶一切仰之施給養護恩厚不薄是地友也四友名甚新奇可喜覺廣絕交論爲煩

寵神姓蘇婦姓王名搏頰見許慎五經異義

吳語有見於釋氏書者如謂露體爲赤骨力靈隱慧遠

禪師云赤骨力貧無一錢呼瓜瓢爲瓢音練見法華文

句記及涅槃經疏睡一覺爲一寤音忽酒僂遇賢禪師

偈云長伸兩脚眠一寤他如呷醋咬陳姜釘椿搖艣

隴山亭雜記 卷一 藏板
韉裏動指停囚長智隈刀避箭前不構村後不迭店
一度被蛇傷怕見斷井索相罵無好言相打無好拳
等雜見不一聊識於此以資談笑

就壻今之贅壻也見公羊傳襄十六年注疏亦稱入舍
女壻見夷堅志

舉子投行卷於公卿舊嘗投而今復投者曰溫卷陸放
翁詩礪教紙熟修溫卷儻得驢騎候熟官

泰山頂碧霞元君宋真宗所封劉侗帝京景物畧云按
稗史元君者當漢時東嶽仁聖帝前有石琢金童玉

女至五代殿圮石像仆唐時金童泐盡女淪於池至
宋真宗封泰山還次御帳滌手池中石像浮於水面
出而滌之則玉女也乃命有司建小祠安奉號爲聖
帝之女封天僊玉女碧霞元君明崇禎朝封天妃爲
天僊聖母青靈普化碧霞元君按閩書天妃姓林氏
父願王氏據閩時願官統軍兵馬使妃乃願之第六
女生於晉天福八年能乘席渡海雲遊島嶼以宋雍
熙四年昇化厥後嘗衣朱衣飛翔海上里人祠之宣
和癸卯給事中路允迪使高麗中流遇風八舟溺其

七獨路舟見妃朱衣坐桅上舟賴以安還奏於朝賜祠額名順濟自是累顯靈應高孝光寧理宗之時竝加封號元世祖時以神護海運有奇應封護國庇民天妃明洪武初亦以護海運加封按此則元君與天妃非一神明矣崇禎時合而一之果何據乎又本朝張學禮使琉球記云舟過梅花所通事言天妃此地人姓蔡爲父投海身亡後封天妃此則與閩書又不同矣

佛道二氏自其迹而言皆與周孔之教相戾而兩家又互爲排擊各不相下迄無定論但道曰長生佛曰無生難易既殊高下自見楞嚴以十種僊與六趣並列有旨哉

善乎司馬君實之言曰老莊欲同死生輕去就而爲神僊者服食修煉以求輕舉其爲術正相戾矣其後復有符水禁呪之術至寇謙之遂合而爲一至今循之其訛甚矣又馬氏端臨曰道家之術雜而多端清淨一說也煉養一說也服食又一說也符籙又一說也經典科教又一說也黃老莊列之書所言者清淨無

爲而已而畧及煉養之事服食以下所不道也至赤
松子魏伯陽之徒則言煉養而不言清淨盧生李少
君樂大之徒則言服食而不言煉養張道陵寇謙之
之徒則言符籙俱不言煉養服食至杜光庭以下以
及近世黃冠之徒則專言經典科教所謂符籙者特
其教中之一事於是不惟清淨無爲之說畧不能知
其旨趣雖所謂煉養服食之書亦未嘗過而問焉道
家本末以上兩說該括無遺矣今按言煉養者卽十
種僊中之堅固金石堅固動止堅固津液堅固精色

堅固思念等言服食者卽堅固服餌堅固草木等言
符籙者卽堅固呪禁也造其極者始得長生然亦必
休止深山或大海島絕於人境合乎清淨無爲之旨
而後得之其得之者不過千萬人中的一二而已而
猶在報盡還來散入諸趣之境至如經典科教皆出
後人杜撰都無深義抑又卑卑不足數矣

世多以鄭櫻桃爲石虎優童詩家亦嘗用之及攷崔鴻
十六國春秋則云櫻桃晉冗從僕射鄭世達家妓也
虎甚寵惑之生子邃宣遵立爲天王皇后及邃以罪

誅鄭廢爲東海太妃後遵自立尊爲太后爲冉閔所殺則以爲優童者謬矣

潘岳西征賦殞吳嗣於局下蓋發怒於一博成七國之稱亂翻助逆以誅錯按史記晁錯傳註錯音厝賦叶韻作七各切令後人爲之不免貽誚

杜牧詩珊瑚破高齊作婢春黃糜按北史馮淑妃傳妃名小憐以五月五日進之號曰續命齊後主寵惑之齊亡周武帝以妃賜代王達後達爲隋文帝所殺以妃賜達妃兄李詢詢母令著布裙配春牧之詩蓋詠

此然以小憐爲珊瑚未知出何書當訪之博聞者又糜者謂粥也以爲春黃梁則可糜豈可作米梁字用耶其謬則王楙野客叢談已辨之矣

坡詩邂逅陪車馬尋芳謝眺洲淒涼望鄉國得句仲宣樓以第一句對第三句第二句對第四句昔人謂之扇對格余謂坡雲龍山觀燒詩崩騰井陘口萬馬皆朱憤搖曳驪山陰諸姨爛紅裙亦扇對也西京賦云招白間下雙鵠投文竿出比目御覽引風俗通云白間古弓名文選作白鷗非扇對濫觸或由乎此

左傳驪姬欲立其子賂二五使言于公曰曲沃君之宗也蒲與二屈君之疆也不可以無主宗邑無主則民不威疆場無主則啓戎心國之患也若使太子主曲沃而重耳夷吾主蒲與屈則可以威民而懼戎且旌君伐使俱曰狄之廣莫於晉爲都晉之啓土不亦宜乎林堯叟注云使俱曰者姬又使二人合辭而稱美其事蓋二人始進前說獻公未決故復使稱說其美余謂林解非也使俱曰亦是二五之語承上二句言如此則使民與戎俱曰晉之疆里於是益廣大矣於

文勢似較順

五子之歌鬱陶乎予心顏厚有忸怩其五言之權輿乎後世詩篇之有其一其二亦昉於此

我不敢效我友自逸八言之始也洞酌彼行潦挹彼注茲九言之始也後之爲九言者亦間有八言則絕少矣

王季重詩如中秋示兒云餅缺先誰嚙瓜圓是我期美人鬪草云大姨誇十錦小妹賽三鮮打臂輕還褪羞願罵復前錢牧齋曰此皆胡釘鉸張打油所不爲也

按太平廣記僊人伊周昌號風子有題茶陵縣詩時謂之覆窠體江南呼淺俗之詞曰覆窠猶今云打油也老杜謂之俳諧體唐人有張打油北夢瑣言傳燈錄並有胡釘鉸

葡萄顆多圓獨哈密所產者其形橢長可徑寸其地又產瓜皆甘美特異於常但不可多得耳

夷堅志云門加扃鎖但壁隙裝輪盤以通飲食按此卽今官署所謂轉筒者也

東坡詩玉川何日朝金闕白晝關門守夜義蓋因盧仝詩有夜義當晝不肯啟夜半醮祭夜半開之句也而夜義守門不知其所從出按釋典云忉利天城七重九百九十九門每門有六十青衣夜義守之玉川詩或用此耶

莊子在宥篇有大物者不可以物物句而不物句故能物物余謂當以不可以物句言不可同於物也物而不物句言雖物而不爲物用也

漢書藝文志載莊子五十三篇今存者三十三篇其中讓王說劍漁父盜跖四篇蘇子瞻以其淺陋不入於

道刪去之是也。說劍篇差爽健以戰國策士之文傳燈錄五臺山隱峯禪師鄧氏子將示滅先問衆曰諸方遷化坐去卧去吾嘗見之還有立化也無曰有曰還有倒立者否曰未嘗見有師乃倒立而化亭亭然其衣順體按傳法正宗記云闍夜多尊者以首倒植而化則倒化不始於隱峯矣但東土則未經見耳顧炎武日知錄曰今之佛經皆題云大秦鳩摩羅什譯謂是姚興國號非也大秦乃西域國名見後漢書西域傳余謂顧氏誤矣凡經必載翻譯人名羅什所譯

皆云姚秦不云大秦也所以稱姚秦者以姚氏立國之時有苻氏亦國號秦故以姓別之曰姚秦苻秦耳姚興請什公譯經見於晉書載記豈顧氏未之攷耶且譯人自漢訖元無慮數百家童壽所翻十之一二而謂佛經皆題羅什之名不已疎乎吳語呼左爲際頌古聯珠通集云去後空留左脚鞋注云左子計切

梁劉孝儀曰鄴中鹿尾乃酒肴之最時魏使崔劼在坐曰生魚熊掌孟子所稱雞跖猩脣呂氏所尚鹿尾乃

有奇味竟不載書籍每用爲怪觀此則知鹿尾自六朝時已尚之矣

踏駁者踏與舛全駁色雜不全也魏都賦云謀踏駁於王義

徐師川喜王秀才見過小酌玩月四言曰君家近市所見天咫尺戶之間容光能幾按國語楚靈王築三城使子皙問范無宇無宇不可王曰是知天咫尺安知民則韋昭注曰咫尺者少也言少知天道耳

報應之說儒者多不之信然彭生之於齊襄也如意之於呂后也魏其灌夫之於田蚡也賈逵王凌之於馬懿也休仁之於孝武也苻堅之於姚萇也非載諸史冊者乎何獨至釋氏而疑之

光武渡滹沱王霸詭言冰堅至前而冰果合唐太宗擊宋金剛登丘而寢賊兵四合有蛇鼠觸面而驚寤金太祖迎遼兵方就枕若有扶其首者三渡混同江無舟以濟乘赭白馬徑涉曰視吾鞭所指而行諸軍隨之以濟元兵分駐江沙而潮汐三日不至信乎真人之興必獲天佑豈偶然哉

魏之有爾朱榮猶漢之有董卓也然榮擒葛榮走元顥其有功於魏朝不小又能識賀六渾於憔悴收黑獺於降人其知人亦超於卓遠矣未可以其殘虐而一視之也

何進之召卓魏肅宗之召榮其事正相類及李傕用賈詡之策而攻長安爾朱世隆納司馬子如之謀而向京師又極相類語云前事之不忘後事之師也後人不能鑒前人之失何耶

古人名與字大率皆一字亦間有兩字而有三字名如令尹子文名穀於菟趙元昊子名佞令哥是也有三字字如張天錫字公純嘏是也明萬曆間汝南秦秀才鎬字京頗工詩袁小修曰京字獨一字自東漢以下無之矣

后稷之孫曰叔均始作牛耕見山海經

饅頭饅字當作糗見東晉餅賦

范至能說燕北人呼酒瓶爲崙卽壘字語訛耳大將之酒瓶必使親信人負之以防毒害號曰背崙故韓世忠之軍用以爲名

越上祕色噐錢氏有國日供奉之物臣下不得用故曰
祕色

汝窰宮中禁燒內有瑪瑙末爲油惟供御揀退者方許
出賣

搏換者漫帛土偶上而髹之已而去其土髹帛儼然成
像矣今謂脫沙者是也

明萬曆中太宰孫丕揚患中人請託難於從違大選外
官始立掣籤之法常熟顧仲恭作竹籤傳以刺之其
文絕佳然其法遂相沿至今

顏氏家訓曰鄴下諺云博士買驢書券三紙未有驢字
言其文多而無當也陸務觀詩文辭博士書驢券職
事叅軍判馬曹

伯夷名元字公信叔齊名致字公達夷齊其謚也見史
記索隱

唐漢中王瑀頗知音聞康崑崙奏琵琶曰琵琶聲多琵琶聲
少蓋樂家以自下逆鼓曰琶自上順鼓曰琶也後人
知此義者鮮矣

語云少所見多所怪佛經言摩竭大魚長十餘里目如

陳光亭雜詩 卷一 藏板
二日齒如白山覽者鮮不以爲荒誕矣宋史載紹興十八年漳浦縣崇照鹽場海岸有巨魚高數丈割其肉數百車不動至剗其目始覺一轉鬣而傍艦皆覆二十四年海鹽縣有巨鰵偃沙上其高齊縣門若但以目所未睹而怪之真夏蟲之見也夫

朱子刈麥詩霞觴幸自誇真一垂鉢何須問畢羅畢羅或旁加食字今俗呼波波千寶周禮注祭用粢粢晉呼爲環餅又曰寒具卽今饊子

古人如而二字通用左傳星隕如雨金剛經如如

下如字

不動古鏡銘和以鉛錫清如明皆當作而孟子望道而未之見而居堯之宮皆當作如若此者非一矣

某御厨者唐長安舊人能爲鷺鷥餅天喜餅馳蹄餒春分餒密雲餅鐺糟炙瓏璫餒紅頭五色餛飩子毋饅頭見陸務觀南唐書雖製法不傳存其名亦自可喜

播州古夜郎且蘭地唐乾符中太原人楊端將兵擊南詔留其地子孫家焉明初楊鑑內附授宣慰使至萬曆時楊應龍叛乃滅以其地置遵義平越二府分屬四川貴州二省楊氏歷二十九世八百餘年軍餉費

至二百萬僅而平之偏沅設巡撫實始於此

白樂天和元微之晨霞詩慈氏發真念念此閻浮人左
命大迦葉右召桓提因按翻譯名義集釋提桓因此
云能天主乃三十三天之主所謂帝釋也雜阿含經
云佛言帝釋本爲人時行於頓施堪能作主故名釋
提桓因則白詩桓提應作提桓爲是梁簡文謝上爲
開講啟云提桓所聽而今得聞可證白詩之誤
廣絕交論匍匐逶迤折枝舐痔按趙岐曰折枝案摩折
手節解罷枝也宋儒註孟子以爲折草木之枝謬矣

唐人詩况伊如燕這身材又這回休更罪楊妃詩中用
這字亦僅見

白樂天詩兩衙但不闕一醉亦何妨陸魯望詩但和大
小包但下俱自注平聲亦少有知者又陸務觀老學
庵筆記姓但者音若檀近歲有嶺南監司曰但中庸
者是也

放翁詩巧曆莫能知雨點智度論摩醯首羅天大雲降
雨雨大千界一切衆生無能知數唯此天王能知之
維摩經維摩詰問文殊師利言何等佛土有好上妙功

德成就師子之座文殊師利言東方有世界名須彌相其佛號須彌燈王其師子座高八萬四千由旬嚴飾第一於是維摩詰現神通力卽時彼佛遣三萬二千師子座高廣嚴淨來入維摩詰室其室廣博悉皆包容無所妨礙又舍利弗心念日時欲至此諸菩薩當於何食時維摩詰知其意卽入三昧以神通力示諸大衆上方有國名衆香佛號香積維摩詰化作菩薩到彼佛前言願得世尊所食之餘於娑婆世界施作佛事於是香積如來以衆香鉢盛滿香飯與化菩薩

薩於是鉢飯悉飽衆會謝靈運山居賦云庶燈王之贈席想香積之惠餐楊炯孟蘭盆賦上妙之座取於燈王之國大悲之飯出於香積之天用此

友人貽余藥物數種中有名獨腳蓮者未識其用攷本草亦不載偶閱夷堅志云鄱陽山間生一種草始萌芽時便似蓮房俗呼爲獨腳蓮移植園圃中蛇虺不敢過其下或被其氣薰漬者多死意卽是此種耶於人或可以治蛇毒也

楊雄解嘲孟軻雖連蹇猶爲萬乘師注云連蹇猶淹蹇

連去聲今吳人罵人爲連蹇本此

餽口字出左傳杜注云餽鬻也後人多訛餽爲糊可笑
杜牧詩流水舊聲人舊耳他山師舊耳聽鶯啼本此
獨孤及詩徒言岍水纔容舫注云纔去聲亦僅見

凡筍下番者不能成竹祇可供食耳曾茶山詩丁寧下
番須留取障日遮風却要渠失其義矣

碎金集云芒種後壬日入梅夏至後庚日出梅歲時記
云梅一作塵亦作徽每年塵高幾尺但看芒種後如
三日得壬卽塵高三尺餘倣此凡安頓書畫物件宜

避塵蒸量其高下置之又神樞經云芒種後逢丙入
梅小暑後逢未出梅

左傳楚子侵鄭至於城麇鄭皇頡戍之穿封戍囚皇頡
公子圍與之爭之正於伯州犁伯州犁曰請問於囚
乃立囚上其手曰夫子爲王子圍寡君之貴介弟也
下其手曰此子爲穿封戍方城外之縣尹也誰獲子
囚曰頡遇王子弱焉後世稱上下其手者本此由是
以觀則宰嚭之諂佞有自來矣

史記作孔子世家王文公曰仲尼之道世天下可也何

特世其家哉處之世家仲尼之道不從而大置之列
傳仲尼之道不從而小此最快論牟子遇闢佛者示
之曰吾之贊佛不能使佛高子之謗佛不能使佛下
二者語意正合

今詩中常用竭來字困學紀聞云始自思玄賦楊升庵
云楚辭車旣駕兮竭而歸不得見兮心傷悲舊註竭
去也又呂氏春秋膠鬲見武王於鮪水曰西伯竭來
無欺我也武王曰不子欺將伐殷也膠鬲曰竭至王
曰將以甲子日至注竭何也若然則竭之爲言盍也

非是發語辭矣顏延年秋胡妻詩竭來空復辭皆謂
盍來始通余謂升庵作盍字解亦不甚明了大畧語
辭之義爲長若膠鬲語則是何字解而伯厚謂始於
思玄賦亦非矣

溫子昇有閶闔門上梁祝文困學紀聞云此上梁文之
始也兒郎偉猶言兒郎懣樓攻媿常辯之余按子昇
文未載兒郎偉之語當更攷之兒郎懣義亦未解

魯昭公乾侯之事當以宋儒胡一桂之說爲正趙氏在
晉猶季氏在魯史墨之對必是窺見晉室君弱臣強

之漸故爲此論以迎合簡子之意耳其曰爲君慎器
與名不可假人乃是正論

朱文公謂佛家竊老子好處道家竊佛不好處上句則
未然下句則良是

陸龜蒙詩手攜鞞鐸法自注云唐言楊枝按西域記云
象堅宰堵波北山巖下有一龍泉是如來受神飯已
及阿羅漢於中漱口嚼楊枝因卽植根今爲茂林後
人於此建立伽藍名鞞鐸法唐言嚼楊枝陸注但云
楊枝其義未備

漢末之董承耿紀晉初之王凌諸葛母丘齊興而有劉
秉袁粲周滅而有王謙尉廻隋季之王威高君雅皆
乃心帝室徇國忘身史家皆以逆書之豈勸忠之義
乎朱子作綱目亦自沿襲舊文未盡糾正何哉

唐書楊妃傳命工貌妃於寢殿貌作入聲梅聖俞詩妙
娥貌玉輕邯鄲自注貌音墨

陳陶詠竹詩青嵐帝亞思君祖綠潤偏多憶蔡邕按陳
張君祖竹賦云青嵐運帝碧空埽煙蔡邕竹贊云綠
潤碧鮮紺文紫錢陶詩用此

今之云字乃員字之省文見書經正義秦誓篇

孟郊詩萱草兒女花不解壯士憂坡詩我非兒女萱

企喻讀曲子夜歡聞並樂府曲歌名宋樂府有讀曲歌

漢書藝文志有尹都尉移植棗杏梅李法淮南子時則

訓其官司空其樹楊宗懔春望詩都尉新移棗司空

始種楊

韓非內儲說似類曰門人捐水而夷射誅濟陽自矯而

二人罪司馬喜殺爰騫而季辛誅鄭袖言惡臭而新

人剗費無忌教郤宛而令尹誅陳需殺張壽而犀首

走故燒芻廩而中山罪殺老儒而濟陽賞也班固漢

書祖之曰子翬謀桓而魯隱危樂書構郤而晉厲弑

豎牛奔走叔孫卒郈伯毀季昭公逐宰嚭譖胥夫差

喪李園進妹春申斃上官譖屈懷王執趙高敗斯二

世縊伊戾坎盟宋座死江充造蠱太子殺息夫作姦

東平誅宋祁復效之曰三宰嘯凶牝奪辰林甫將蕃

黃屋奔鬼質敗謀興元感崔柳倒持李宗覆楊升庵

云東坡贈朱壽昌詩長陵竭來見大姊仲孺豈意逢

將軍開皇空記苦桃面建中天子終不見西河郡守

誰復譏潁谷封人羞自薦亦用此法又奇矣余讀劉
夢得詩歎牛云員能霸吳屬鏤賜斯旣帝秦五刑具
長平威振杜郵死垓下敵禽鐘室誅傲舟云越子膝
行吳君忽晉宣尸居魏臣怠白公厲劍子西晒李園
養士春申易是效此法者又不始自東坡矣容齋隨
筆云此法本自荀子成相篇

昔人有三句詩楊柳裊裊隨風急西樓美人春夢中翠
簾斜捲千條入唐人作也桂樹蒼蒼月如霧山人故
中讀書處白露濕衣不可去唐天驪寄友詩也又明

雲南提學彭綱詠刺桐花云樹頭樹底花楚楚風吹
綠葉翠翻翻露出幾枝紅鸚鵡楊升庵詩話云刺桐
花雲南名爲鸚哥花以花形酷似也彭詩本四句命
史寫刻於匾遺其一句復誦之覺意足乃不更改

困學紀聞說文飲器象爵者取其鳴節節足足也宋符
瑞志鳳凰其鳴雄曰節節雌曰足足然則爵卽鳳凰
歟按兩都賦上觚稜而棲金爵注云金爵鳳也則爵
之爲鳳信矣

落花人獨立微雨燕雙飛晏小山詞佳句也全唐詩作

翁宏詩門掩落花春去後
牕含殘月酒醒時
錢牧齋列朝詩集中張彥倫詠愁詩也
全唐詩作韓漑但以春去爲人別耳
昔人之作多有傳寫錯誤者
俟考正之

段柯古有興善寺左顧蛤像聯句詩
自注云舊傳隋帝嗜蛤所食必兼蛤味
數逾千萬矣忽有一蛤椎擊如舊帝異之
寘諸几上一夜有光及明肉自脫中有一佛二菩薩像
帝悲悔誓不食蛤非陳宣帝也而傳燈錄載唐文宗嗜蛤
蚬海民供遞甚勞一日御饌中有

擘不張者帝以其異卽焚香禱之
乃開見菩薩形儀梵相具足
遂貯以金粟檀合賜興善寺令僧衆瞻禮
召惟政禪師問是何祥師曰此乃啟陛下之信心耳
帝悅據柯古注則六朝之時已有此像矣
抑文宗時別有一像耶不然豈有事出本朝而昧焉者耶

莊子齋物論嗒然似喪其耦蓋物之所以不齊惟其耦也
喪其耦而後能使形如槁木心如死灰楞嚴云塵既不緣根無所偶
反流全一六用不行身心快然獲大安隱信乎莊生之書與佛教相表裏也

養生主一篇本說養生末又說送死正見生有涯而養其無盡者無涯是進一步法與逍遙遊用大不如無用人間世用世不如出世同一機軸

指窮於爲薪火傳也不知其盡也薪有盡而火無窮喻形有死而元神無死也者个元神便是生之主養者養此而已

余每愛左氏傳夏訓有之曰有窮后羿以一句發端莊子人間世南伯子綦曰此果不材之木也以及於此其大也嗟乎神人以此不材與左氏一樣筆法而拖神人以此一句過下用筆更奇

齊物論夫隨其成心而師之誰且獨無師乎蓋人處世間酌應之際皆不免有成心既有成心則是非由此而生物之所以不齊也返而求之於未成之前則渾然一性善惡不萌安所論是非哉禪家云覓心了不得又云迷時結性成心悟時釋心成性又云向父母未生前道取一句便是這箇道理

古詩人生天地間忽如遠行客又云所遇無故物焉得不速老莊子云藏舟於壑謂之固矣然而夜半有力

者負之而走昧者不知信浮生之不足把翫矣及讀
楞嚴月化日遷刹那不住微言精義勝妙獨出恍然
如更上一層樓也

秋水篇夔憐蛇五句是過峽文字五句爲綱下一段是
目徐無鬼篇中亦然有暖姝者三句是綱下三段是
目此古人文字提綱之祖

班固漢書沿襲史記處爲多而賈生傳載生諸疏晁錯
傳載錯言兵事貴粟及賢良策韓安國傳載大行王
恢辯擊匈奴一段甚詳匈奴傳補太始元年以後至

王莽事讀者宜詳之

木難碧色珠也南越志云金翅鳥沫所成今所謂祖母
綠智度論云摩羅伽陀珠金翅鳥口邊出綠色能辟
一切毒其說與志合

甕鼻出十六國春秋後趙錄謂鼻塞也當作鼈
活板自宋布衣畢昇始慶曆間人

左傳莊公寤生杜氏解以爲寤寐而莊公已生夫婦人
免身豈細故耶寤寐而兒已生恐無此事應劭風俗
通曰兒墮地能開目視者爲寤生余按高麗王位宮

其曾祖宮生能開目視位宮初生亦然高麗呼相似
爲位故名曰位宮則應氏之說爲近之

高僧傳隋釋法進業坐禪後教水觀家人取柴見繩牀
上有好清水拾兩白石安著水中進暮還寺彌覺背
痛問其家人云安石子語令明往可除此石及旦進
禪家人還見如初清水卽除石子所苦便愈其事與
月光童子絕相類信知如來藏中性水真空循業發
現也

左傳華不注在今山東濟南歷城縣東北下有華泉逢
丑父使公下如華泉取飲是也華讀如花不讀如柎
柎跗跌並音字花鄂足也象萼蒂形萼與鄂通花下
有萼萼下有跗相承覆也李太白詩昔我遊齊都登
華不注峯茲山何峻秀綵翠如芙蓉正取花跗以比
擬之耳毛詩鄂不韡韡不亦應讀孚朱傳讀如字訓
豈不失之矣

金題押頭也玉躡軸心也錦暉卷首帖綾又謂之玉池
繡杼音蹄標外加竹界而打搨其覆首名曰標杼見
米海岳書史

宋史姦臣傳二十一人而閩人居其九蔡確呂惠卿俱
晉江人章惇浦城人蔡京僊遊人父子兄弟四人黃潛善吳處
厚俱邵武人

詩鴛羽王事靡盬許氏謂王事不可以不堅緻常熟顧
大韶曰以不堅固訓盬字毛鄭皆然以不可以三字
訓靡字則其解頗曲而未暢竊謂靡盬二字各自爲
義漢書爲酒以靡穀注靡散也說文靡披靡也徐曰
披靡分也蓋謂王事如草之披靡而不植如盬之細
碎而不堅固正臣子勤勞奔走之時也余謂此說最

爲近理然先儒從無此解姑識於此
無衣序云美晉武公也武公始并晉國其大夫爲之請
命乎天子之使而作是詩孔氏曰武公以孽奪宗於
法不當賜之命曰美者其臣之意美之也程氏曰武
公始有晉國而能請命天子故詩人美之美其所可
美也申公說唐公孫伋弒三君而取其國畫以寶器
賂周僖王王命之爲晉侯國人作此以刺之朱子痛
闢小序主刺不主美是也觀孔程二說則美中固有
刺矣

陔裘自我人居居自我人究究朱注居居究究未詳毛氏曰居居懷惡不相親比之貌究究猶居居也據爾雅居居究究惡也毛說蓋本此

葛生序云刺晉獻公也好攻戰則國人多喪矣按春秋傳獻公伐驪戎滅耿滅霍滅魏伐東山臯落氏滅夏陽滅虢滅虞敗狄於采桑所謂好攻戰也

秦風車鄰未見君子寺人之令鄭氏曰欲見國君者先令寺人傳告之秦之用寺人舊矣其後遂以寺人亡天下今者不樂逝者其耄言爲樂恐失時也厥後始秦風車鄰未見君子寺人之令鄭氏曰欲見國君者先皇并天下大興宮室鐘鼓美人之奉蓋秦俗自昔已然君以此始必以此終信哉

楊泉物理論稻粱菽各二十種爲六十蔬果之實助穀各二十爲四十凡百穀故豳詩云播百穀

國風之關雎小雅之鹿鳴舊說以爲刺詩余意孔子刪詩正樂雅頌各得其所恐不應以刺詩冠風雅之首自當以小序爲正

天保定爾朱注云爾指君也余按申公說此大臣祝頌天子之詩祝君而謂之爾者蓋稱天以臨之

采薇序云文王之時西有昆夷之患北有獫狁之難以天子之命命將率遣戍役以守衛中國故歌采薇以遣之出車以勞還杖杜以勤歸也鄭氏曰此文王爲西伯服事殷之時也漢書匈奴傳懿王時王室衰戎狄交侵詩人疾而歌之曰靡室靡家獫狁之故豈不日戒獫狁孔棘至懿王曾孫宣王興師命將以征伐之詩人美大其功曰出車彭彭城彼朔方則又以采薇出車爲懿王宣王時詩蓋秦火之後簡帙散佚經師習傳各有異同耳

魚麗正義以君子有酒旨絕句且多二字爲句言酒既旨美魚復衆多下三章還覆上三章首章且多四章云物其多矣二章且旨五章云物其旨矣三章且有六章云物其有矣明是緊疊上文物字皆指魚也朱子以有酒旨且多爲句言酒旨而又多似不如舊說之爲善

楞嚴經烏菴國沙門彌伽釋迦譯語彌伽釋迦此云能降伏宋高僧傳云釋迦稍訛正云鑠佉此曰雲峯與長水疏異

雲棲宏公曰古本筆授後有羅浮沙門懷迪證譯一行
 今本失之宜從古增入按開元釋教錄云懷迪循州
 人住羅浮山南樓寺遇梵僧賈梵經一夾請共譯之
 勒成十卷卽楞嚴經是也錢牧齋曰按譯場有證梵
 本證梵義證禪義各一員私譯不具設員故無證梵
 等位迪久習經論備諳五梵能兼三譯之任故兼稱
 證譯也

於與于音義並同書經多作于惟金滕爲壇於南方北
 面酒誥人無於水監當於民監作於

湛露厭厭夜飲不醉無歸按燕禮君曰無不醉賓及卿
 大夫皆對曰諾敢不醉此所謂不醉無歸也

庭燎孔氏曰美宣王勤於政事因以箴之其說是也鄭
 箋以爲王不正雞人之職而問夜早晚故詩人箴之
 其說淺矣

圻父鄭箋云書曰若疇圻父謂司馬也按書酒誥篇矧
 惟若疇圻父薄違蔡九峯註以若疇句薄違句與鄭

氏不同蓋古今句讀之異耳如論語書云孝乎句惟
 孝友於兄弟句而潘安仁閑居賦作孝乎惟孝亦類

此也

無羊牧人乃夢衆惟魚矣集註云夢人乃是魚穿鑿可笑凡注有必不可從者此類是也

十月之交艷妻煽方處箋作閹妻蓋漢書杜欽傳云然班婕妤賦云悲晨婦之作戒兮哀衰閹之爲郵閹卽艷也

宛彼鳴鳩翰飛戾天按國語秦伯賦鳩飛韋昭注云小宛之首章也

小弁朱註宜曰作此以自怨序以爲太子之傳作不知何據按朱註孟子亦云宜白之傳作此詩今註詩獨不主序說蓋惡序之過而忘其自相矛盾矣

何人斯朱註云蘇公不欲直斥暴公故但指其從行者言愚按詩旣言惟暴之云則已明指暴公何云不欲直斥耶又云以從暴公而不入我門則暴公之譖也明矣竟若此詩之作專責暴公之譖已而借何人以爲辭則全失詩之本義矣

大東或以其酒以下三章錯舉天漢織女牽牛啟明長庚天畢南箕北斗皆刺當時在位之人不稱職唐盧

陸光亭祭詩 卷一
三
藏板

全月蝕詩蓋本此
楚茨序曰刺幽王也政煩賦重田萊多荒民卒流亡祭
祝不饗故君子思古焉孔氏曰言古之明王能政簡
斂輕田疇墾闢年有豐穰時無災厲下民則安土樂
業祭祀則鬼神歆饗以明今不然故刺之朱註此詩
述公卿有田祿者力於農事以奉宗廟之祭不主序
說下信南山甫田大田意畧同今考詩中無公卿田
祿之文不知朱子何所據也五章鐘鼓送尸鄭氏云
尸出入奏肆夏也肆夏是天子之禮毛鄭主思古明

王故引周禮爲說朱子主公卿奉祭則不當仍肆夏
之文郊特牲大夫之奏肆夏也由趙文子始也是卿
大夫不得奏肆夏矣朱子說誤也

甫田朱註此述公卿有田祿者力於農事以奉方社田
祖之祭而卒章末二句云此皆賴農夫之慶而得之
宜報以介福使之萬壽無疆也以萬壽無疆頌農夫
恐於理未安朱子說詩有極踈脫處此類是也

大田朱註此詩爲農夫之辭以頌美其上若以答前篇
之意竊謂曾孫主祭之稱農夫稱公上爲曾孫恐未

安亦未知朱子何所據也

瞻彼洛矣朱註此天子會諸侯於東都以講武事而諸侯美天子之詩蓋本魯詩說也今按韎韐乃將率之服非天子所御保其家邦亦非頌美天子之辭

裳裳者華序云刺幽王也古之仕者世祿小人在位則讒諂並進棄賢者之類絕功臣之世焉朱註此天子美諸侯之詩蓋以答彼洛矣也乃鑿空之說無所依據

桑扈朱註不從序云天子燕諸侯之詩然無所據

鴛鴦呂氏曰楚茨至鴛鴦八篇皆陳古以刺今也序曰刺幽王也古之明王交於萬物有道自奉養有節焉朱註謂此爲諸侯答桑扈之詩未知何據顧氏大韶曰朱註鴛鴦于飛則畢之羅之矣君子萬年則福祿宜之矣夫鴛鴦之雁畢羅比豈吉祥善事而以興人主之福祿乎此二章乃一正一反以爲諷諫于飛則畢之羅之在梁則戢其左翼明動者之有災靜者之无咎也周自昭王南征而不復穆王西征而徐叛自此以還以巡狩爲危事故卜征五襲吉而後行此所

謂交萬物有道而詩人以為諷也正與魚藻王在在
鎬飲酒樂豈同義一吟咏而知非盛世之詩矣此之
不解豈所謂以意逆志者乎

顧大韶字仲恭常熟人少治詩義專門名家錢牧齋亟
稱之其論詩曰詩有齊韓魯三傳毛傳出而三家廢
鄭箋時與毛異唐宋諸儒多與毛鄭異朱子盡掃毛
鄭槩以鄭衛為淫風世儒皆知其繆其尤踳駁者則
不取義之興也既不取義矣又何興乎又有全不會
小序之意妄自刪改者伐木之序曰燕朋友故舊也

自天子至於庶人未有不須友以成者此篇乃答上
篇棠棣之意雖燕親戚而以朋友為重棠棣譏雖有
兄弟不如友生至於父舅兄弟亦當以酒食相親洽
也朱子取小序首句而刪去下二句則直以父舅兄
弟為朋友矣其可通乎

頰弁序曰刺幽王暴戾無親不能宴樂同姓親睦九族
也朱註以為燕兄弟親戚之詩玩詩中死亡無日無
幾相見情詞迫感決非歡樂喜悅之語而如彼雨雪
先集惟霰憂禍之義顯然自當以序為正

車牽序曰刺幽王嬖褒姒而思得賢女以配君子也朱
 註以為宴樂新昏之詩今玩首章思妾季女逝兮明
 是想望而未得之辭鮮我覲爾覲爾新昏通篇語意
 皆然若新昏而燕樂則既已得之何為復作想望語
 耶

魚藻朱註云天子燕諸侯而諸侯美天子之詩采菽天
 子所以答魚藻也與前篇鴛鴦之義同皆不主序說
 未知何據

角弓老馬反為駒朱註云但知讒害人以取爵位而不
 自知其不勝任如老馬憊矣而反自以為駒竊意此
 詩乃刺王不親九族不應連章叙小人之貪爵位也
 菀柳上帝甚蹈朱註改作神據戰國策以改經恐未可
 訓

都人士朱註謂亂離之後人不復見都邑之盛人物之
 美而作是詩玩經文無亂離之意

白華朱註謂申后被黜而作此詩之子與碩人皆指幽
 王非也衛詩碩人其頎碩人指莊姜此詩碩人正指
 申后莊姜失位與申后見黜畧相似故詩人皆以碩

人稱之詩人既惡褒姒決不稱以碩人而一篇之中
既斥王爲之子又斥王爲碩人於屬文亦無是體也
縣蠻朱註此微賤勞苦而思有所託者爲鳥言以自比
也玩詩文絕無鳥言之意以教誨施之於鳥已不可
以後車載之豈復有是理乎

文王緝熙敬止毛鄭與朱子皆以熙爲光明止爲語助
愚謂緝熙爲光明則學有緝熙於光明復作何解止
爲語助則大學之敬止何以有止仁止孝之說耶

板上帝板板與苑抑上帝甚蹈正同假上帝之尊以斥
王也朱子以爲天帝誤矣

抑序以爲刺厲王然武公當厲王時年尚幼稚未爲諸
侯不應作詩刺王故孔穎達以爲追刺厲王也朱子
則以爲武公專以自警絕非刺王余考詩意乃託於
自警以刺王其自傲卽所以刺王也視爾夢夢我心
惻惻聽用我謀庶無大悔若專以自傲不必設爲我
爾之辭朱子意在排斥小序故其說如此

江漢告于文人朱註云文人文王也作召公考云作康
公之廟噐勒王策命之辭以考其成亦無所據

召旻昏椽靡共自毛鄭而下皆主幽王信用奄人惟集
註不從今按瞻卬時惟婦寺正與此篇昏椽相合集
註於婦寺已主奄人立說何于此反獨不然

惟天之命朱註何之爲假聲之轉也恤之爲溢字之訛
也蓋據左傳何以恤我之文今左傳杜註以此爲逸
詩况就詩說詩不煩改經從傳又詩序辨此詩無告
太平之意然則清廟一章亦無成洛邑朝諸侯之意
朱子何以取之維清之奏象舞烈文之卽政助祭序
必有所據而云然不知朱子何以槩不取也

執競朱註云此祭武王成王康王之詩朱氏孟章曰以
周禮考之執競乃九夏之一是作於周公之時非祭
成王康王也余按國語金奏肆夏樊遏渠孔疏云肆
夏時邁也樊遏執競也渠思文也

烈祖序云祀中宗之詩朱子以爲祀成湯之樂辨之云
此詩未見其爲祀中宗者然必以爲祀成湯亦未知
何據

宋龔開作宋江等三十六人贊三十六人者曰呼保義
宋江智多星吳學究玉麒麟盧俊義大刀關勝活閻

羅阮小七尺八腿劉唐沒羽箭張清浪子燕青病尉
遲孫立浪裏白跳張順船火兒張橫短命二郎阮小
五花和尚魯智深行者武松鐵鞭呼延綽混江龍李
俊九紋龍史進小李廣花榮霹靂火秦明黑旋風李
逵小旋風柴進插翅虎雷橫神行太保戴宗先鋒索
超立地太歲阮小二青面獸楊志賽關索楊雄一直
撞董平兩頭蛇解珍美髯公朱仝沒遮攔穆廣拚命
三郎石秀雙尾蠍解寶鐵塔天王晁蓋金鎗班徐寧
撲天鷗李應宋史宋江等以三十六人橫行河朔此

諸人姓名意必當時所傳為有據也錢牧齋詩月下
劉唐尺八腿本此

貫休詩以楞嚴為禪髓樂天詩以壇經為佛心神髓佛
心的是好對

蜀人呼粽為糝筒吳中謂糝粒為米果見放翁詩

坡詩甚欲去為湯餅客湯餅世所謂長命麪也劉禹錫
贈張盥進士詩憶爾懸弧日余為上座賓舉筋食湯
餅祝辭添麒麟坡詩正用此見宋人馬永卿嬾真子
宋人詩白髮衰天癸丹砂養地下屬對甚工

洛陽謂牡丹為花成都人謂海棠為花會稽謂菜葉為葉

山谷詩蟹胥與竹萌乃不羨羊腔陸德明周禮音釋云蟹胥蟹醬也

宋仁宗賜懷璉禪師龍腦鉢孟師曰吾法以瓦鉢食此鉢非法對使者焚之後乞還山英宗賜手詔有經過庵院任性住持語師藏之不以示人東坡為師撰宸奎閣記欲一見師終不出示寂後始得之笥中後代善知識恐未易有此

唐元黃之維摩詰畫像碑言論辯了有類鵬者按鵬者舍佛之聲聞弟子也佛言言論辯了而無疑滯鵬者舍比丘是見增壹阿含經第三卷餘經未見故表而出之鵬者舍應是梵語不知華言云何檢翻譯名義集聲聞部亦無可考

藥草獨腳蓮見夷堅志余已記之矣又考本草註土宿

真君云獨腳蓮能制汞又陸武園祚蕃粵西偶記云

獨腳蓮根如黃連而大治癰疽腫毒持入藥肆肆中諸藥香氣盡消以此為真三脚五脚者次之武園官

粵西學使其得之見聞者必有據矣

莊子知北遊夫子之問也固不及質正獲之問於監市履豨也每下愈况此一段從來解者皆以固不及質爲句所以爲之解者多迂曲難通玩文勢當以固不及至豨也十四字爲一句質正卽周禮質人掌成市之貨賄人民牛馬者獲則質正之名也監市猶監門市吏也履實也履豨估實價也每下謂先問其首而漸及於尻也况喻也曉也設市有賣豨者就質正平其價質正問於監市監市則履豨首以至於尻舉其

肥瘠則豨價曉然使問其首而不及於尻則豨價未曉也豨之首尻有異不可謂尻之非體也道之上下有異不可謂下之非道也質正之問知尻之爲豨而夫子之問不知屎溺之爲道故曰不及也

莊子徐無鬼齊人躄子於宋者其命闔也不以完言齊人憎其子投之宋宋人以爲闔如此解較舊說似直截

莊子外物篇物之有知者恃息息生也言有此受生之性而後有知覺

莊子大宗師以德爲循者言其與有足者至於丘也而人真以爲勤行者也丘高地也言凡有足者無不願遊焉至人之以德爲循亦遊焉而已豈真勤行之哉又曰是自其所以乃猶云乃其所以如此也是倒字法莊子應帝王紛而封哉句一以是終句謂萬事雖紛而封域不出於一也以是終者總結食豕如食人以下五句言列子守此學術以終其身也

明陸采曰唐宋諸帝謚號皆取漢晉所未用者雖遼金亦能知此惟元氏好蹈襲本朝因之故諸廟之號同於唐宋諸陵之名亦然余按陸氏之說是矣然唐之肅宗則漢章晉明元魏孝明北齊孝昭已有此號其後金頰淑刺亦謚肅宗又金世宗父追號睿宗金盈哥遼主璟號穆宗金亮父號德宗又金主珣號宣宗皆同唐號金熙宗父號徽宗西夏主仁孝號仁宗遵頊號神宗竝同宋號金章宗父號顯宗全漢明晉成宋孝宗同晉穆遼天祚號順宗同唐

列子曰古者神聖之人備知萬物情態悉解異類音聲周禮夷隸掌與鳥言貉隸掌與獸言介葛盧知牛音

公治長辨雀語後世廣漢陽翁偉李南並能知馬鳴
 渤海僧隆多羅識猪語楊宣知鵲鳴見於左傳論衡
 抱朴子益都耆舊傳等書今得其傳者鮮矣遼宗室
 神速姑能知蛇語更奇

唐人謂中書舍人為小鳳翰林學士為大鳳丞相為老
 鳳蓋以中書省有鳳池也又謂儀部之長曰大儀員
 外曰中儀主事曰小儀見鄭谷集宋人謂直龍圖閣
 為假龍龍圖閣待制為小龍龍圖閣學士為老龍見
 方勻泊宅編

劍南詩輕雷軋軋斷梅初殘籜縱橫過筍餘自注云鄉
 語謂梅雨有雷為斷梅謂筍出林為過筍斷梅過筍
 殊有韻致

又詩浮蟻撒嘗人散後撒嘗謂釀新成未及漉先用醖
 撒而嘗之也見白香山詩

又詩藜粥數匙晨壓藥蓋用藥而欲其力達下部者醫
 家每云以美膳壓之是也

又詩秃尾猶無漫漢驢事出北齊書楊愔傳

又詩阿囷畧如郎罷老囷音減顧况集閩俗呼子為囷父

爲郎罷此詩戲用閩語也馮定遠以爲不可

老杜詩獻花何日許門徒翻譯名義集徒弟子謂門徒弟子

法喜禪悅者法喜謂見法生內喜也世人以妻色爲悅菩薩以法喜爲悅禪悅食者謂以禪法資其心神而得禪定之樂卽得增長資益也

楞嚴經阿難已知如來世尊訶須菩提及大迦葉爲阿羅漢心不均平事見維摩經須菩提以長者豪富自恣多懷貪吝愍其迷惑故多就乞食迦葉以貧人昔

不植福故生貧里愍其長苦欲令積善多就乞食淨名謂萬法同相不應分別故並譏之經云如來所訶者兩羅漢皆佛大弟子歸功於佛也

王勃普惠寺碑譯雉林之寶偈按智度論昔有野火燒林林中有雉入水漬羽以救其焚卽雞頭摩寺也亦名雞園

毛道凡夫者謂行心不定猶如輕毛隨風東西也見魏譯金剛經

壞色衣卽袈裟也壞色有三種一青謂銅青二黑謂雜

泥三木蘭謂樹皮

白樂天雜興詩四月芰荷發越王日遊嬉左右好風來
香動芙蓉蕊嬉字叶上聲他詩未見

樂天東林寺白蓮詩洩香銀囊破効陶詩團團新晴月
林外生白輪銀囊白輪字甚新

僧史畧云唐天寶元年西蕃五國來寇安西二月十一
日奏請兵解援發師萬里累月方到明皇詔不空三
藏誦仁王護國陀羅尼方二七遍帝忽見神人五百
員帶甲荷戈在殿前帝問不空對曰此毗沙門天王

第二子獨健副陛下心往救安西也其年四月奏二
月十一日巳時後城東三十里雲霧晦冥中有神長
丈餘被金甲至酉時鼓角大鳴地動山搖二日蕃寇
犇潰斯須城樓上有光明天王現形謹圖樣隨表進
呈帝因勅諸道州府於西北偶居置天王像按毗沙
門此云多聞福德之名聞四方故北方天王名也卽
今之真武是天王各居四方一面而此土多祀真武
他未聞焉應是唐世遺風矣

東坡羅漢贊梵書旁行俛首注視法苑珠林云昔造書

之主凡有三人長名曰梵其書左行次曰佉盧其書
 右行少者蒼頡其書下行梵佉盧居于天竺黃史蒼
 頡在于中夏梵佉取法於淨天蒼頡因華于鳥跡文
 畫誠異傳理則同

昔如來在雪山修道芻尼

此云野
 鵲子

巢于頂上佛既成道芻

尼受報為那提國王東坡法雲寺禮拜石記云芻尼
 巢頂霑佛氣分後皆受報謂此事也受佛氣分用楞

嚴經語

經言一由旬此云四十里考智度論則有分別大者八

十里中者六十里下者四十以中邊山川不同致行
 里不等耳

六祖袈裟至今尚存曹溪即達磨所傳也西域屈昫布
 所成緝木棉花心織之此云大細布其色青黑

錢牧齋詩相看莫是意生身按楞伽經云通教登地菩
 薩得如幻三昧能現無量自在神通普入一切佛刹
 隨意無礙意欲至彼身亦隨至故名意生身

梁簡文帝大法頌云般若聿宣通身盡笑乍讀之殊未
 解後檢智度論乃釋然論曰問笑從口出或時眼笑

今云何言一切身笑答曰佛世界中尊特自在能令一切身如口如眼故皆能笑復次一切毛孔皆開故名爲笑

聞梅檀寺藏有比丘尼頂骨現一佛二菩薩像未知果否俟他日過訪之

明永樂中喇嘛入中華者首著紅帽周妻何肉皆所不禁所謂大寶法王二寶法王者也其後乃有著黃帽者來名宗喀巴則屏葷血絕房室矣二弟子一名達賴喇嘛一名板成吳圖克免其教至今尚存而紅帽

者遂衰焉

西洋

地有熱沙數十里行者觸之必致病彼土人能知其候須謹避之過數日後乃可行亦焚法師西域記所載身熱頭痛之類也

陀羅尼者秦言能持謂集種種善法能持令不散又翻遮持謂遮二邊之惡持中道之善也又翻爲呪法華疏云呪是鬼神王之名號稱其王名則部落敬主故能降伏一切鬼魅或云呪者如軍中密號唱號相應無所訶問又呪者願也如螺贏之祝螟蛉願其類我

佛菩薩說呪願諸衆生皆如我之得成正覺也此是心印多者千言少或一字故在五種不翻之列又天仙神鬼以及左道旃陀亦能說呪但邪正善惡各有不同耳至若此土所傳普庵呪者不知初自何人其荒謬固不待言而僧俗至乃被之管絃以爲悅耳之具則尤可嗤矣

楞嚴云純燒沉水無令見火此焚香之妙諦也宋人詩微叅鼻觀猶疑似全在爐煙未發時是從此悟得須達長者將圖精舍供佛佛命舍利弗同往須達自手

捉繩一頭舍利弗捉一頭其經之時舍利弗欣然含笑須達問尊者何笑答言汝始於此經地六欲天中宮殿已成汝果報也梁簡文善覺寺起刹啓鶯鶯引繩方斯取埒舍利弗此云鶯子也

六和敬者和同愛敬也一同戒和敬二同見和敬三同行和敬四身慈和敬五口慈和敬六意慈和敬見法界次第僧稱六和蓋本於此

華嚴演義鈔云日廣清淨洞徹分明諸齒方整堅密鮮白江總優填像銘云眸雲齒雪簇十六字爲四字具

見琢鍊之妙

佛印與蘇子瞻書世多有刊本余收得其真蹟亦稍有異如刊本人生一世間真蹟無間字縱未得到如來地真蹟作未能三世諸佛則是一箇有血性的漢子真蹟作亦只是至於言下承當刊本作脚下自當以言下爲是書末珍重下刊本多一也字似亦覺贅猩猩羶或謂以猩猩血染成得名非也余詢西洋人云彼中有一種紅果味甘可食用其汁染罽作大紅色雖水漬泥污永久不渝此土所製者反是真贗之辨

可以證知矣

佛成道已在道樹下時有五百商人經過二爲首者以蜜麩供佛四天王各持一鉢奉上盛食佛皆受之累置掌上按合成一爲應供噐陸龜蒙開元寺佛鉢詩空王初受逞神功四鉢須臾現一重開元寺在蘇州高青丘姑蘇雜詠中亦有詩未知鉢今尚存否

大阿育王經佛滅度後八國共分舍利阿闍世王分得八萬四千以紫金函盛之作千歲燈火於五恒河沙水中造塔藏之梁簡文帝與僧正教云塔裏紅函止

陞光學齋記 卷一 藏板
傳舍利是也

羽緞來自西洋此間人以為鳥毳所成蓋顧名思義云爾彼中實用羊毛織之蓋彼土羊毛較中國者特細高麗紙堅緻光澤人言是搗繭為之余昔年奉使朝鮮詢之士人云是楮皮所作按本草釋名云穀音媾亦作構陸機詩疏云構幽州謂之穀桑或曰楮桑荆揚交廣謂之穀李時珍曰楮本作杓其皮可績為紵故也楚人呼乳為穀其木中白汁如乳故以名之陸佃埤雅作穀米之穀訓為善誤矣陶弘景曰南人呼穀

紙亦為楮紙陸氏又云江南人績其皮以為布又擣以為紙長數丈光澤甚好用之最博楮布不見有之由斯以觀則楮皮為紙其來遠矣然今江南罕得其法蓋中華失傳流於外裔者往往有之寧惟楮紙哉宋傅亮文殊菩薩讚在昔龍種今也童真按文殊師利此云妙吉祥是過去龍種上尊王佛童真者即是童子顯非童真行不能入佛法經中稱文殊善財等皆為童子非謂稚齒也

影響眾者謂往古諸佛菩薩隱其圓極之果示同機眾

匡輔法王如影之隨形響之應聲也見法華文句楞嚴會中若文殊普賢觀音勢至諸大菩薩皆非迦文弟子特以助宣大教故隱大現小各陳圓通正是影響能仁耳

余家所藏法帖多有宋榻佳本風日晴美時一展觀古香縈拂几研間迴非後代所能摹擬因錄其題跋圖章如左賞鑒家亦或有取焉

聖教序乃弇州所藏有王世貞印元美弇州山叟圖書申少師瑤泉跋云懷仁集右軍書古今流傳不翅天

球弘璧顧碑林模榻歲無虛日石有損剝字有殘闕近時欲求善本百不得一二此本獨完好如初榻時當是宋本得者宜寶藏之吳郡申時行題

虞恭公碑江南安氏物也前有安紹芳印康瓠齋祕笈後有琳瑯館安氏懋卿圖籍等圖書秦對巖有跋謂是碑余家有二本此其次者亦不可得矣愚按此帖世不多見其書法謹嚴中更饒姿態中雖有闕字要是宋榻無疑對巖名松齡官江南之無錫人

隙光亭雜識卷一終



